

# **Свщмч. Ермогенъ, патр. Московскій и всея Россіи († 1612 г.)**

## **Житіє и жизнь иже во святыхъ отецъ нашихъ, Гуріа, перваго архієпископа новопросвѣщеннаго града Казани, и Варсонофія, епископа Тферскаго, Казанскихъ чудотворцовъ**

### **Глава 1.**

**Въ** лѣта благочестиваго и христолюбиваго самодержда Русскія земли, великаго князя Василія Васильевича всея Русіи, при святѣйшемъ митрополитѣ Ѳотіѣ Кіевскомъ и всея Русіи. Егда восхотѣ Богъ болма своего угодника прославить, свѣтильнику не подѣ землею быти, но всѣми-же видиму быти. Случися и се по нѣкоему строенію Божію. Церкви обвалившеся весма во время божественныя Литургія; священникомъ еще во алтари. Но благодатию /**л. 358 об.**/ Христовою и молитвою угодника его Святаго Чудотворца митрополита Алексія вси невредими сохранени быша. И тако тоя мѣсто очистивши, хотяще паки воздвигнути новую церковь. И начаша копати рвы во основаніе церкви, и абіе обрѣтоша тѣло блаженнаго Алексія цѣло и невредимо, и ризы его не

истлѣвша. О, превеликое чюдо! толикимъ лѣтомъ поминувшимъ и святому во гробѣ лежащу - не измѣнися святое его тѣло и ризы его, яко вчера оболчены; понеже убо да сбудется реченное Богомъ во святомъ Евангеліи - не можетъ градъ укрытися верху горы стоя, и никтоже, вжегъ свѣтильникъ /**л. 359.**/ поставляетъ его подъ спудомъ, или подъ одромъ. Такоже и саму свѣтильнику не мощно на толико лѣтъ сокровену быти подъ землею; се же все бысть премудраго Бога промышленіемъ. Яко же слышано бысть Святаго обрѣтеніе, и се слышавше благовѣрный и христолюбивый князь Василій Васильевичъ и вси благовѣрніи князи - придоша скоро на дивное чюдо и на обрѣтеніе тѣла Святаго и при святѣйшемъ же Фотіи, митрополитѣ Кіевскомъ и всея Русіи, и съ нимъ же епископы и прозвитеры, весь чинъ церковный придоша со псалми и пѣніемъ и свѣщами и съ кандилы хвалу велію воздающе всемогущему Богу /**л. 359 об.**/ и угоднику его Чудотворцу Алексію. Народи же московстіи мнози съ радостію стекошася видѣти честное и святое его тѣло. Пришедъ же благовѣрной и великій князь Василій Васильевичъ всея Русіи и вси благовѣрніи князи - видѣвша таковую славу Божию и поклонившася Святому и божественному его тѣлу преподобнаго отца нашего Алексѣя и возрадовася радостію

великою зѣло; и, вздохнувъ изъ глубины сердца, глаголя: хвалю и славлю Тя Господи Боже мой и Пречистую и Непорочную Твою Матерь, яко сподобилъ мя еси раба твоего въ моя лѣта видѣти таковое сокровище и благодати /**л. 360.**/ державы моя явити ми. Якоже убо далъ еси намъ второй источникъ благодатный во градъ нашемъ Москвѣ, творящая намъ, дивныя чюдеса послѣднему роду нашему, не токмо же единому граду нашему, но и всѣмъ градомъ и страномъ съ вѣрою притекающимъ. Но и такова дивная чюдеса и дары милости Твоея получитьи, Владыко, уже ничимъ же охуженъ есми Божія благодати отъ всѣхъ Святыхъ мужей. О, Предобне Святителю нашъ, Чудотворче Петре, и Святителю Христовъ, преподобне отче нашъ, Чудотворче Алексѣю! не престаите вкупѣ къ Богу молиста за ны и за вся вѣрныя рабы своя; вы бо еста скорая /**л. 360 об.**/ помощника и заступника земли нашей Рустѣй и стѣна неборимая присному граду нашему Москвѣ. Великій же христолюбивый князь и вси съ нимъ благовѣрніи князи и боляре и вельможа ихъ и вси московстіи народы цѣловаста святое его тѣло любезно. И по семъ церковь воздвижена бысть, зѣло прекрасна, Богу на се поспѣшествующу. И святаго тѣла въ рацѣ положиша въ предѣлѣ честнаго Благовѣщенія

Владычица наша Богородица, на десной странѣ, идѣже суть видими святыя его мощи и донынѣ, всѣмъ исцѣленія обильно подающе; принесены же быша мощи его месяца мая въ 20 день, на память св. мученика Ѡалилея, да не умолч/**л. 361.**/ано будетъ истина, и да речено будетъ праведное: Елма бо обаче Богъ не токмо въ животѣ прославляющихъ его прославляетъ, но и по смерти явлену быти многими различвыми чудесы, о нихъ же да речется мало отъ многихъ.

Повѣсть полезна, яко близъ очима зрится: но недоумѣніе и скудость разума, яко птицу по воздуху парящу, далечайшу отъ ума нашего творить. Но обаче надѣяся на множество щедротъ Сына Божія, Господа и Бога нашего и Спаса Христа Ісуса, и на молитвы преподобныхъ угодниковъ его, и царскаго ради повелѣнія, и архіерейскаго ради благословенія, дерзнухъ коснуться хартіи и трости. Аще бо и не обрѣтохъ святыхъ сихъ святителей и преподобныхъ отецъ отъ младенства знающихъ житіе ихъ и отечество извѣстно: но обаче еже слышахъ отъ вѣдящихъ, сія и написати дерзнухъ. Обрѣтенію же честныхъ и чудотворныхъ нетлѣнныхъ ихъ мощей первый самовидецъ быхъ, и своима руками осязахъ святыя ихъ мощи и чудотворныя прежде всѣхъ; къ сему же еще, во время обрѣтенія честныхъ мощей ихъ, и гласъ нѣкоему

вѣрну слышашеся. отъ гласа же слово сіе бысть: во градѣ обстояніа удиви Господь святаго своя. Къ сему же еще и сіе да воспомянуто будетъ: еще бо живѣ сый святой Варсонофій, къ нѣкому клирику въ мірѣ живущу, рѣчь нѣкаку прозрительну посла съ духовникомъ своимъ, еже послѣди и сбытся по пророчеству святаго; живяше бо тогда святой Варсонофій во градѣ Казань въ созданнѣй отъ него обители, святаго боголѣпнаго Спасова Преображенія, оставя паству Тѣрскаго престола. Къ сему же еще и мнѣ непотребному случися въ той святѣй обители, пятому по немъ быти, и на мѣстѣ его стояти, и жезлъ его въ руку моею держати. Послѣди же Богу изволившу, аще и зазритъ ми кто дѣло сіе, страшно бо сіе мнѣ есть, и зазрително отъ многихъ: понеже неключимъ быхъ таковому великому и пресловущему и имени, не токмо дѣлу; но обаче и на святаго Гурія мѣстѣ стояхъ, и жезлъ его такожде въ руку моею носихъ, числомъ же отъ перваго девятый быхъ, въ преименованіи же первый. И сія вся воспоминахъ, и судихъ самъ въ себѣ: аще не дерзну коснуться повѣсти, боюся осужденія лѣниваго раба, взявшаго господина своего сребро, и прикупа не сотворшаго, якоже самая истина рече Господь и Богъ нашъ; и паки во второмъ законѣ: не явишися, рече, предъ



Господемъ тощъ, но койждо по сихъ дароносити; великому же Василию глаголющу: поставленный убо на строителство слова, и не брегій о семъ, яко убійца судится; великій же богословесный Григорій глаголетъ: безчестіе бо есть еже молчати, о ихже потреба есть глаголати; многій же и великій въ словесѣхъ златоустый Іоаннъ: аще удержу, рече, слово, и не подамъ, тогда убогъ есмь, аще подамъ, богатѣ буду: аще не подамъ, единъ богатѣю, аще подамъ со всѣми радостенъ плодъ принесу. Якоже убо и трость писца безъ пишущаго праздна есть, тако и стрѣла стрѣльца безъ влекущаго ю недвижима есть, и требуетъ споспѣшника; или якоже цѣвница, аще кто не будетъ ударяяй ю, праздна является и бездѣльна: тако и мы, аще оставимъ о сихъ святыхъ повѣсти писати, о обрѣтеніи честныхъ и чудотворныхъ мощей ихъ, и множествѣ чудесъ, праздни будемъ и бездѣлни, и съ лѣнивымъ рабомъ точная пріимше обрящемся. Обаче же нѣсть мое поспѣшеніе или силы, но отъ Бога есть все человѣческое исправленіе; самъ бо Господь глаголетъ: яко безъ Мене не можете ничтоже творити; мы же елико вѣмы, то и принесемъ во славу Богу, и въ похвалу святымъ.

## **Глава 2. О рожденіи святаго Гурія, архіепископа Казанскаго, чудотворца.**

Сей убо преподобный и святой отецъ нашъ Гурій, якоже повѣдають, рожденеіе его и воспитаніе во градѣ Радонежи, родомъ отъ меншихъ боярь, въ міръ бѣ имя ему Григорій сынъ Григорьевъ, по реклу Руготинъ. Случися же ему служити у нѣкоего князя, именемъ Іоанна, иже именовашеся Пенковы, или за скудость имѣнія, или по насилію, якоже многожды случается сильнымъ неволею порабощати меншихъ. Григорій же бѣ нравомъ смиренъ, и тихъ, и беззловивъ, и къ Божіей Церкви прилѣжно притекая, и постомъ и молитвами, и милостынею, и цѣломудріемъ, и протчими дѣлы добрыми: тщаніе имѣя не лѣнностно, како бы угодили Богу, къ сему же и дѣвственное житіе возлюби, не изволи бо жены пояти, но чистоту тѣлесную паче почте; послушествуетъ же сему и пречестное тѣло его, нетлѣніемъ бо почтесе отъ Бога. И тако Григорію въ добродѣтели живущу, и видя добронравіе его господинъ, нача его любити, такоже и госпожа его, за смиреніе его и кротость. и за протчія добродѣтели, нача брещи его; господинъ же его повелѣлъ быти Григорію въ дому своемъ стоителемъ, и вся домовная вложи въ руку его: и бѣ строяся въ дому его вся добрѣ.

### **Глава 3. О страданіи темничномъ святаго и праведнаго отца нашего Гуріа, архієпископа Казанскаго, чудотворца.**

Старый же и общій врагъ нашъ діаволь, не хотя видѣти человека въ добродѣтели живуща, и въ заповѣдехъ Божіихъ ходяща, воздвизаетъ на добляго брань, якоже древле на праведнаго и святаго отрока Іосифа, и научаетъ старшія клеветы его завидѣти праведному, и творитъ лгати на преподобнаго, якоже и древле старцы оны на цѣломудренную, и влагають во уши господину своему суетная, и вяжутъ вѣнцы преподобному, душамъ же своимъ въ препинаніе плетутъ сѣти, клеветуютъ на преподобнаго забывше реченнаго: пространно слово клеветнику на языцѣ его, внутрь же его душа его тѣмъ страшно связуется; и паки глаголетъ писаніе: трети вещи клеветникъ пакоститъ клеветующему, клеветущаго, самъ себѣ, обаче вся бѣды на судъ клеветнику единому. Но что убо реку: не единому Григорію творятъ клеветницы напасть искушенія, но и госпожу и чадъ ихъ сводятъ въ печаль неудобьстерпимую: повѣдаютъ Григоріа сплетшася съ госпожею своею беззаконіемъ. Господинъ же Григоріевъ сія слышавъ, вскорѣ и безъ испытанія повелѣваетъ умертвити Григоріа. Сынъ же господина его разуменъ сый, и



ощутивъ вещь злую сію, и нестерпимый срамъ отцу своему и матери, и самъ себѣ испытываетъ по толку клеветниковъ онѣхъ, якоже и Даніилъ на цѣломудренную клеветущихъ; къ сему вѣру емлетъ и матери своей, яко зло сіе замышленіе ложно, и отъ діавола содѣяся, а никакоже истинна; и умоляетъ отца, да не ускоритъ клеветущимъ вѣру яти, и не предастъ себе стыду конечному, и ихъ чадъ своихъ да не осрамитъ вѣчно: и да не обезчестится, рече, весь родъ нашъ, безъ испытанія бо, глаголетъ, таковому дѣлу не подобаеъ быти. Господинъ же Григоріевъ, яко отъ изумленія во умъ прииде, и послушливъ бываетъ отецъ своему сыну, повелѣваетъ отъ смерти отвести Григорія: обаче же горкому и лютому предастъ праведнаго заточенію, якоже и соименитаго тому преподобнаго святителя арменскаго, или яко акрагантійскаго великаго и чудеснаго: ровъ убо глубокъ ископовается, въ немже и твердыми стѣнами древа темница готовится, и ту неповинный яко злодѣй вводится, и дверь закрывается, мало оконце токмо на верху земли оставляется, идѣже быти пищѣ метаемъ: ядь же бѣ преподобному даема не человѣческа, на три убо дни вметаеъ бываетъ преподобному единъ снопъ овса, такожде и воды скудною мѣрою; и въ таковой убо бѣдѣ преподобный наипаче

простирашеся на славословіе Божіе, терпя и благодаря Бога о всемъ, поминая древнихъ святыхъ мученія и терпѣніе. И въ таковой бѣдѣ преподобному уже ко исходу втораго лѣта близъ приходитъ, отлагаетъ страхъ нѣкто клеветъ его, иже бѣ прежде другъ ему, и умоляетъ стрегущаго его, приходитъ ко оконцу темницы Григоріевы ноцію, и вопрошаетъ: како пребываніе его? Григорій же о всемъ и во всемъ благодарствуетъ Бога, и Пречистую Богородицу, и всѣхъ святыхъ; другъ же его обѣщается ему приносить ядь; Григорій же не повелѣваетъ тому яди приносить къ себѣ; многа бо, рече, и преизобилна благодать Божія питаетъ его; и воспоминаетъ въ писаніи глаголемое: яко всяка душа не наказанна неисцѣльна, не убо люто, еже уязвену быти, но люто еже не уцѣломудрится язвою; токмо повелѣ приносить къ себѣ бумаги, чернилъ и трость; другъ же его сотвори по повелѣнію его; Григорій же писаше книжицы малыя, яже въ наученія бывають малымъ дѣтищамъ, и повелѣваше продавати сія, цѣну же ихъ нищимъ раздаяти, себѣ же никакоже ничтоже отъ яди и отъ протчихъ потребныхъ, кромѣ бумаги и чернилъ, не повелѣваше приносить. Господину же его никтоже смѣяше о немъ вспомянути; самъ же господинъ его, или забывъ, или Божіе

смотреніе тако бысть: понеже никакоже  
вспомяну Григоріа.

#### **Глава 4. О изшествіи изъ темницы блаженнаго и приснопамятнаго отца нашего Гуріа архієпископа.**

Егда же Григорію преидоша въ темницѣ лѣта  
два, тогда во единѣ отъ дни явися ему во  
дверѣхъ свѣтъ: онъ же во ужасѣ бысть, чая быти  
вражію мечтанію, и воставъ нача молитися:  
понеже въ два лѣта никогда же отверсты бѣша  
двери тыя; и паки свѣтъ бысть во дверѣхъ болши  
перваго, двери же затворены бяху; Григорію же  
вземшу рукою дверь, и абіе отверзеса; онъ же  
разумѣ, яко Божію быти смотренію, и возьмъ  
образъ Пресвятыя Владычицы нашея  
Богородицы, иже бѣ въ темницѣ у него, и изыде  
дню сущу, никимже видимъ, и иде изъ дому того  
и изъ града.

#### **Глава 5. О пришествіи во обитель Пречистыя Богородицы святаго страдальца отца нашего Гуріа Іосифову Ламскаго, въ ней же и постриженъ въ монашескій чинъ.**

И прииде въ пречестную обитель Пресвятыя  
Богородицы, честнаго и славнаго ея Успенія,  
иже Іосифовъ именуется, бѣ бо обѣщался, въ  
темницѣ сѣдя, ту пострищися; и пострижеса въ  
той обителя, и преименованъ бысть отъ Григоріа

въ Гуріа и Божією благодатію бысть монахъ чудень, и живяше по монастырскому чину и обычаю, и игумену и братіи во всемъ повинуюся, по писанному: повинуйтеся братіе наставникомъ вашимъ, рече, и покаяйтесь, тїи бо бдять о душахъ вашихъ, понеже слово имъ воздати о васъ. Послѣди же бысть игумень тоя пречестныя и великія обители; потомъ же оставляетъ паству немощи ради тѣлесныя, и паки по малѣ времени самодержцемъ посылается во игумены святыя живоначальныя Троицы, иже Селижаровъ именуется.

## **Глава 6. О поставленіи во архіепископа святѣйшаго отца нашего Гуріа.**

И егда убо изволи Богъ предати благочестивому и христолюбивому государю царю и великому князю Іоанну Васильевичу всея Россіи самодержцу, болгарскія земли отчину его градъ Казань: тогда благочестивый царь совѣтова съ отцемъ своимъ и богомолцемъ святѣйшимъ Макаріемъ митрополитомъ Московскимъ и всея Россіи, и съ протчими святыми Росскія земли митрополіи, кого поставити архіепископомъ новопріятому и новопросвѣщенному граду Казани; избирають изъ архимандритовъ и изъ игуменовъ четырехъ благоговѣйныхъ и преподобныхъ священномонаховъ, въ нихже бѣ и Гурій

преподобный; и любимъ бываетъ самодержцу царю и святителю преподобный Гурій; обаче не восхищаютъ на ся суда Божія, но полагаютъ на волю Божию, и апостолски избираютъ жребіемъ: и повелѣваютъ царь же и святитель написати имена сихъ избранныхъ четырехъ честныхъ и духоносныхъ священныхъ монаховъ, и положити на престолъ велицѣй церкви, Пречистыя Владычицы нашея Богородицы и приснодѣвы Маріи, честнаго и славнаго ея Успенія; и пѣвше молебная берутъ отъ престола два жребія, въ нихже обрѣтается единъ Гуріевъ, и паки полагаютъ она два жребія, и пѣвше молебная, взимаютъ единъ отъ нихъ отъ престола, и обрѣтается паки имя преподобнаго Гуріа. Царь же и митрополить, и весь соборъ священный и вси людіе воздаша о семъ славу Богу вси вкупѣ: яко избра Богъ мужа праведна и свята новопросвѣщенному граду Казани, и овященной паствѣ первоначалника. Волею же самодержавнаго царя, и благословеніемъ преосвященнаго Макарія митрополита всея Россіи, и совѣтомъ всего яже о немъ священнаго собора, въ лѣто седмъ тысящъ шестдесятъ третіе [1555], февруаріа въ 7 день, поставленъ новопросвѣщенному граду Казани и новому граду Свіяжскому и протчимъ градомъ, въ третіе лѣто по взятіи города Казани, первый



архієпископъ преосвященный Гурій. Самодержецъ же посылаетъ со архієпископомъ въ соборную церковь Пресвятыя Владычицы нашея Богородицы честнаго и славнаго ея Благовѣщенія чудныя мѣстныя иконы, и прочее церковное драгое строеніе; книги же многіе вдаетъ изъ своея царокія казны; къ тому же и изъ честныхъ монастырей повелѣваетъ самодержецъ архієпископу образы и книги приносить влаstemъ; самого же Гуріа архієпископа по премногу почти, и честныя и драгія церковныя вещи многи вда ему. Посылаетъ же самодержецъ со архієпископомъ два архимандрита на болшую архимандрію, и обитель составить Пресвятыя Богородицы честнаго и славнаго ея Успенія во градъ Свіяжскъ, изъ Старицы града богородицкаго архимандрита Германа Садырева-Полева, иже по первомъ преосвященномъ Гуріи архієпископъ бысть въ Казанѣ второй архієпископъ, его же мощи неисповѣдимыми Божіими судьбами мнѣ недостойному многогрѣшными моими руками осязати изволи Богъ, и надгробная пѣвше соборнѣ погребсти честныя его мощи въ созданнѣй его обители, Пресвятыя Владычицы нашея Богородицы, честнаго и славнаго ея Успенія въ Свіяжскомъ градѣ; преставибося сей преподобный архієпископъ Германъ въ

царствующемъ градѣ Москвѣ, въ лѣто седмъ  
тысящъ седмдесять шестаго [1567], ноября въ 6  
день; пасъ церковь Божию три лѣта и мѣсяцъ  
восемь; бѣ же тогда на Москвѣ моръ силенъ;  
повелѣ же себе положить въ чину  
святительскомъ, якоже повѣдають ученицы его,  
обаче тогда не сподобися святилски погребенъ  
быти, не сущу бо тогда митрополиту, ни иному  
кому обрѣстися отъ святитель во градѣ Москвѣ  
грѣхъ ради нашихъ. но тако просто погребенъ  
бысть архимандритомъ паствы своея  
свѣяжскимъ Иродіономъ и казанскимъ  
Іереміемъ, въ чину святителскомъ, якоже повелѣ,  
у церкви святаго Николая, яже зовется мокрый,  
и лежа тамо, дондеже у благочестиваго государя  
царя Θεодора Іоанновича всея Россіи испросиша  
мощи его ученицы его, и: привезоша въ  
монастырь въ лѣто седмъ тысящъ сотое; мы же  
со благословеніемъ господина и отца нашего  
святѣйшого Іова, патріарха Московскаго и всея  
Россіи, честнѣ погребохомъ его, септемвріа въ (?)  
день. Бѣ же тогда и благоуханіе веліе отъ мощей  
его не токмо во олтарѣ и въ церквѣ, но и по  
всему монастырю, якоже всѣмъ дивитися. И изъ  
монастыря святаго Николая, иже зовется  
Песношскій, посылаетъ самодержецъ игумена  
Варсонофіа, о немже намъ слово предлежитъ, и

сему повелѣваетъ быти архимандритомъ въ пресловущемъ градѣ Казанѣ, еже и бысть.

## **Глава 7. О отпущеніи изъ царствующаго града Москвы въ Казань святѣйшаго Гурія архіепископа.**

И того же лѣта, въ седмую недѣлю по пасцѣ, совѣщааетъ благочестивый самодержецъ царь и великій князь Іоаннъ Васильевичъ всея Россіи со отцемъ своимъ митрополитомъ Макаріемъ всея Россіи, въ соборной и великой церкви Пресвятыя Богородицы, честнаго и славнаго ея Успенія, повелѣваетъ царь митрополиту и всему священному собору молебная пѣнія совершати, и святить воду святымъ и животворящимъ крестомъ, и тако съ чудотворными иконами и съ честными и животворящими кресты, самъ самодержецъ и съ братією своею, и митрополитъ со всѣмъ освященнымъ соборомъ, и всенародное множество, провождаютъ честныя и чудотворныя иконы мѣстныя, коимъ въ Казанѣ быти, и архіепископа Гурія, съ литією и пришедъ предъ градныя врата, иже именуются Флоровскія, и ту совершаютъ молебная; и тако самодержецъ, и братія его, и бояре, у архіепископа Гурія благословляются, и отпускаютъ касатися путному шествію; такоже и святой Макарій митрополитъ всея Россіи Гурія архіепископа, и архимандритовъ Германа и

Варсонофіа. и всѣхъ людей, иже съ нимъ въ путь  
грядуть, осѣняетъ ихъ честнымъ и  
животворящимъ крестомъ, и благославляетъ ихъ  
въ новопросвѣщенный градъ Казань.

**Глава 8. О пришествіи въ царствующій  
градъ Казань святѣйшаго Гурія  
архіепископа, и о прочемъ жителствѣ его въ  
пресловушемъ градъ Казань.**

И Божіею благодатію, и молитвами Пречистыя  
Владычицы нашея Богородицы, и всѣхъ святыхъ  
молитвами, преподобный Гурій архіепископъ со  
архимандриты, и со священными мужи, и съ  
честными монахи, и съ прочими людми, иже съ  
ними путь шествоваша, въ пресловущій градъ  
Казань здрави приидоша, и молебная пѣнія  
Господу Богу и Спасу нашему Ісусу Христу, и  
Пречистой Богородицѣ, и всѣмъ святымъ  
совершиша, и святивъ воду честнымъ и  
животворящимъ крестомъ, и служивъ  
божественную Литургію со архимандриты и со  
всеосвященнымъ соборомъ, и посылаетъ къ  
самодержцу и къ митрополиту о своемъ  
благополучномъ прибытіи въ градъ Казань. И  
такъ преподобный Гурій архіепископъ  
первопрестольникъ бываетъ  
новопросвѣщенному граду Казани и прочимъ, не  
украдь власти, ниже восхитивъ, ниже гонивъ  
честь, но честію гонимъ, ниже чловѣчу

благодать, но отъ Бога и Божественну пріимъ; и  
сбытся о немъ, якоже речено бысть въ Писаніи:  
Азъ предахъ тя, и Азъ помогу ти, яростію малою  
поразихъ тя, и милостію вѣчною прославлю тя:  
болши мѣра челоуколюбія твоего, паче мѣры  
наказанія. Живяше же преподобный богоугодно,  
нищія кормя, и неимущія всѣми потребами  
удовляя, и бѣдныя, и вдовицы, и сироты  
заступая, и отъ бѣдъ изимая, и труды къ  
трудомъ прилагая, и обнощное стояніе присно  
въ молитвахъ выну принося къ Богу, близъ бо  
келліи его церковь святыхъ великихъ  
страстотерпцевъ Бориса и Глѣба, и въ той  
многотруднѣ обычай бѣ ему молитвы творити, и  
всякими добрыми дѣлы угождая Богу, и  
крѣпкимъ житіемъ по Бозѣ живяше, и къ  
вѣрнымъ слово здраво и немятежно и учително  
имѣя, и невѣрныя уча и наказуя познати  
истиннаго Бога и творца всему, и вѣровати во  
Отца и Сына и Святаго Духа, во святую и  
нераздѣлиму Троицу единосущну, и многи  
невѣрныя въ вѣру приведе, и крести ихъ  
множество и жены и дѣти; всюду убо Божія  
богато изліяся благодать, по писанному:  
посѣтилъ еси землю, и упоилъ еси ю, умножилъ  
еси обогатити ея даромъ благодати Святаго  
Духа, святымъ крещеніемъ; и явишися мнози  
отъ невѣрія православніи, ихже имена въ



книгахъ животныхъ. И бываетъ преподобный. яко нѣкое древо добродородно, кипящее плоды красными, и всѣмъ произносящее богато оwoщіе: тако и сей божественный мужъ Гурій архієпископъ ученіемъ своимъ множество душъ присвояетъ Христу.

## **Глава 9. О преставленіи преблаженнѣйшаго, великаго во ієрарсѣхъ архієреа, святѣйшаго пастыря и учителя, Казанскаго владыки Гуріа.**

Егда же убо прииде время, о немъ же и псаломникъ рече: дніе лѣтъ нашихъ, въ нихже семдесятъ лѣтъ, аще же въ силахъ осмдесятъ лѣтъ, и множае ихъ трудъ и болѣзнь: тако и сему преподобному прииде время: старость бо, рече пророкъ, честна, но немноголѣтна, ни въ числѣ лѣтъ исчитается. Въ болѣзни же слежа святой много время; повѣдаютъ бо, яко на трилѣтнее время протягнутися болѣзни его; токмо на святые великія праздники господскія къ церкви къ Лѣторгії ношаху его; и тогда въ церкви лежаше или сѣдѣше, стояти же не можаше; обаче душевнаго любомудрства не преможе тѣлесная болѣзнь; о Бозѣ бо ревность легцѣ крилѣ творить, якоже и здрава тѣлеса имущимъ, тако и сей преподобный душу имѣ надѣ тѣломъ яко воеводу; аще бо и въ болѣзни лежаше, но пѣніе непрестанно къ Богу возсылаше, потомъ же и

воздержаніемъ удручая тѣло свое, по вселенныя учителя глаголющему слову: егда изнемогаю, тогда силенъ есмь; тогда убо глаголаше возмогати душевнѣй симъ, егда тѣлесныя изнемогають слабости, и на всякъ день яко начало полагаше; здѣ бо челоуѣческое житіе, рече, требуетъ трудомъ дѣланіе, будущее же воздаяніе, и подвизавшіися на земли наслѣдять въ радости небесныя, и отложще тлѣнная, нетлѣнная воспріимуть; не бо суть достойна страданія нынѣшняго вѣка противу хотящей славѣ открытися; аще бо и писано есть: отъ болящаго не истязуетъ Богъ поста ни трудовъ, токмо терпѣнія и благодаренія, но сей преподобный мужъ къ симъ и сія совокупи, всѣхъ трудовъ касается, и къ Богу симъ присвояется; и многихъ невѣрныхъ ученіемъ своимъ сотвори отступити отъ злобъ ихъ, и отъ бесерменскія ихъ вѣры, и просвѣти ихъ банею Святаго Духа, святымъ крещеніемъ, и прежде бывшія хулники устроивъ славити Отца и Сына и Святаго Духа. И въ старости добрѣй бывъ, позна отшествіе свое къ Богу; и декемврія во второй день призываетъ предпомянутаго архимандрита Варсонофіа, имя же бо къ нему любовь велію духовную, и повелѣваетъ ему возложить на себя великій образъ, еже есть святая схима; въ четвертый же день тогоже

мѣсяца декемвріа въ осмый часъ ноци отходитъ ко Господу, въ лѣто 7072; пасъ Церковь Божию лѣтъ восемь и мѣсяць девять; и повелѣ положить святое и трудолюбное тѣло свое во обители боголѣпнаго Спасова Преображенія за алтаремъ у болшія церкви; и погребоша земли сродное честное и святое тѣло его честнѣ со псалмы и пѣснми духовными.

### **Глава 10. О бояринѣ святаго Гурія, архіепископа Казанскаго, Іоаннѣ Застолобскомъ и о сынѣ его Димитріи.**

Въ тоже время, въ дому Пречистыя Богородицы честнаго и славнаго ея Благовѣщенія, царевымъ повелѣніемъ служа преподобному Гурію архіепископу бояринѣ именемъ Іоаннѣ Застолобскій, мужъ благъ, ненавиद्या неправды, и отъ всякаго зла огребаяся, и умъ крѣпокъ имѣя, къ преподобному же Гурію архіепископу велію вѣру и любовь имѣя при животѣ святаго, такожде и по смерти, и гробницу надъ гробомъ святаго, и клѣтъ каменну немалу содѣлавшу ему. Ему же Іоанну сынъ бѣ по плоти, именемъ Несторъ. по рекломъ Димитрій, тако же тихъ и кротокъ, смиренъ и беззлюбивъ, и во младости старъ смыслъ обрѣташеся въ немъ, и разумъ многолѣтнихъ сѣдинъ живяше въ немъ; постомъ же и молитвою, и бдѣніемъ, и суходѣяніемъ

удручая тѣло свое; ктому же, никому же вѣдѣящу, ношаше на тѣлѣ своемъ подъ срачицею власяницу жестоку; и бѣ видѣти умиленъ взоръ, ризою убо свѣтлою одѣянъ бѣ, якоже боляромъ обычай, блѣдностію же лица и тонкостію тѣла его поста ради, яко и хлѣба не ядый являшеся; бѣ же и той служа на трапезѣ архіепископовъ, полагая имъ хлѣбъ. Предпомянутый же Іоаннъ, отецъ сего Нестора. зовомаго Димитрія, богатъ зѣло. Сему же Нестору никакоже о богатствѣ міра сего радѣти, ниже о чемъ о мірскихъ вещехъ попеченіе имѣти, якоже обычай сверстниковъ его, якоже всѣмъ намъ знаемо бѣ, и прежде монашества монахъ познавашеся; потомъ же умоляетъ отца, и въ монашеская облачится, въ той же велицѣй обители боголѣпнаго Спасова Преображенія, и Нектарій преименуется; и мало время пребывъ, отходитъ ко Господу, егоже измлада возлюби. Отецъ же его Іоаннъ погребаєтъ тѣло его въ тойже клѣти, идѣже преподобный Гурій лежаше; вѣрую бо, рече, молитвами святаго, якоже обѣщамися, да умолитъ и о насъ Христа. Потомъ же и Іоаннъ постригаетъ власы главы своея, и Іона преименуется; и мало поболѣвъ, конецъ житія пріять, и въ той же клѣти каменной, юже самъ созда, повелѣваетъ погребсти тѣло свое, близъ святаго Гурія.

## **Глава 11. О рожденіи святаго Варсонофіа, епископа Тферскаго, Казанскаго чудотворца, и о плѣненіи его въ Крымъ.**

Преподобный отецъ нашъ Варсонофій рожденіе и воспитаніе имѣ во градѣ Серпуховѣ; въ міръ же бѣ имя ему Василій, сынъ нѣкоего іереа именемъ Василіа; и данъ бѣ отцемъ своимъ въ наученіе грамматѣ; и еще не у достигшу ему совершеннаго возраста, плѣненъ бысть отъ крымскихъ татаръ и заведенъ въ плѣнъ, и пребывая въ плѣнѣ и благодаря Бога, работая невѣрнымъ со всякимъ усердіемъ и со смиреніемъ и кротостію, и воздержанію многу обучая себе, сна же мало приѣмля, и всякія добродѣтели прилѣжно касаяся, и изъ устъ поя псалмы Давыдовы, ихже помня, и біетъ ратники Ісусовою молитвою, по писанному: не обрящеши бо, рече, крѣпчайши того оружія ни на небеси, ни на земли. Невѣрніи же, имже служаше Василій, видяще его въ таковомъ устроеніи, дивятся многому разуму, и добронравію, и правдѣ, и нелицемѣрнымъ трудомъ его, и смиренію, и на всяку страду безъ хулнаго роптанія, и послушаніе, и во всемъ беззлобіе, и непрекословна послушателя, повелѣвають Василію во ослабѣ жити и страдѣ не касатися.

## **Глава 12. О изведеніи изъ плѣна блаженнаго Варсонофіа, Казанскаго чудотворца, и о**



## **пришествіи во обитель, Андроникову зовомую, въ нейже и пострижеся въ монашескій образъ.**

Егда же тріе лѣта преидоша въ плѣнѣ Василю, тогда Божіимъ смотрѣніемъ приходитъ въ невѣрныхъ землю іерей Василій, отецъ Василюевъ, и искупуетъ его отъ плѣна и тако возвращается Василій въ Россійскую землю, извыкъ до конца бесерменскій языкъ, и грамоту срацынскую, бѣ бо глубокъ умъ имѣя. И прииде въ пресловущій градъ и великій царствующій Москву, и входитъ въ монастырь зовомый Андрониковъ, и отлагаетъ власы главы своея, вкупѣ же соотлагаетъ и мірская вся мудрованія, и бываетъ зовомъ Варсонофій; изыщно же бѣ доволенъ и книжному ученію, и божественному гласованію; и помнитъ въ божественномъ писаніи лежащая: яко здѣсь убо и злая и благая конецъ имутъ, будущая же вѣчна и безсмертна, и во вѣки не имутъ конца; и проходитъ добрѣ монашеская натриженія, яко и самодержцу царю знати его, монашескаго ради труда и добронравія; и бываетъ достоинъ пасти Христова стада словесныхъ овецъ.

## **Глава 13. О произведеніи во игуменство Варсонофіа, епископа Казанскаго, чудотворца.**

Посылається самодержцемъ, и благословляється святителемъ, хранити путь, иже вводитъ въ некончаемое блаженство царства небеснаго; и бываетъ полконачальникъ Христовымъ воиномъ, игумень и отецъ чадомъ честныя обители, иже на Песношѣ, великаго во святителяхъ и всемірнаго ко Христу молебника Николая, безпрестани аки рѣки милостивыхъ чудесъ изливающего; и оттолѣ водимъ водящимъ въ радость безконечную, и ключимъ бываетъ на составленіе паствы новыя.

#### **Глава 14. О посланіи архимандритомъ въ Казань святаго отца Варсонофіа, Казанскаго чудотворца, и о созданіи отъ него обители боголѣпнаго Преображенія Христова.**

И повелѣваемъ бываетъ благочестивымъ царемъ, и святителемъ, быти архимандритомъ боголѣпнаго Преображенія Господа и Бога и Спаса нашего Ісуса Христа, и составить обитель новую въ новопросвѣщенномъ градѣ Казани; еже и бысть: Христовою благодатію, и по благословенію преосвященнаго Гуріа архієпископа, монастырь сооружаетъ, и церкви созидаетъ, и келліи поставляетъ, и до нынѣ убо Богомъ соблюдаемъ младѣетъ и распространяется, яко древо при водахъ благолиственно и доброплодно; приносить же убо не яко древо тлѣненъ плодъ и единомъ

временемъ кончающся, но нетлѣненъ и безконеченъ плодъ, отъ негоже и хвала Творцу возсылается: святые, глаголю, святители и преподобные монахи, ихже имена въ книгахъ животныхъ написана суть. Да не зазритъ ми кто о словеси семъ: видѣхъ бо во святѣй обители сей, не токмо сихъ святыхъ тѣлеса нетлѣніемъ почтени отъ Бога, но и монаси и мѣрстіи нетлѣнни мнози обрѣтошася, еще же и святаго града Іеросалима благоволи Богъ святому мужу и преподобному Епифанію, архіепископу монастыря святыхъ Голгоѣы, въ той же честнѣй обители положитися. Къ преподобному же святителю Гурію Варсонофій архимандритъ имяше во всемъ послушаніе, и духовный союзъ, и любовь нелицемѣрну, и во всемъ повинуюся и совопрошаяся, и съ молитвою и со благословеніемъ его вся творяше; постомъ же и молитвою, и слезами и бдѣніемъ, и всенощнымъ стояніемъ тѣло свое удручая; ношаше же преподобный Варсонофій и вериги на тѣлѣ своемъ, никомуже вѣдущу. И бысть во всемъ образъ братіи къ добродѣтели, монахи наставляя, и мирскія поучая, и невѣрныхъ приводя во Христову вѣру, бѣ бо, якоже и преди рекохомъ навѣкъ писанію срацынскому, и мухамедова скверная преданія срацыномъ добрѣ вѣдый, и языками многими вѣद्याше

глаголати, и стязаяся съ невѣрными, и укоряя ихъ, и препирая, и ко крещенію приводя, уча и наказуя вѣровати во святую Троицу, Отца и Сына и Святаго Духа; всякому бо дѣлающему благое Богъ помогаетъ на благое, якоже рече нѣкто отъ древнихъ святыхъ: благодареніе, рече, пріемлющаго подвижетъ дающаго, яко и болша дарованія подати ему.

### **Глава 15. О поставленіи во епископство блаженнѣйшаго отца Варсонофія славному граду Тфери.**

Потомъ же Божіимъ смотрѣніемъ, по повелѣнію самодержца государя царя и великаго князя Іоанна Васильевича всеа Россіи, въ лѣто седмь тысящъ седмдесять [\[1\]](#) Аѳанасіемъ, митрополитомъ Московскимъ и всея Россіи, поставляется на епископство славному граду Тфери, на Акакіево мѣсто преподобнаго епископа, сему убо ко Господу отшедшу: жившу на епископствѣ сорокъ лѣтъ, и добрѣ Богу угодивъ, преставися. Сему же преподобному Варсонофію еще діакону сущу у преподобнаго Акакіа живущу ему, якоже самъ повѣда ученикомъ своимъ, и многаши къ нему Акакію глаголати, за многая лѣта преставленія своего: яко быти тебѣ, рече, Варсонофіе, здѣ Тфери епископомъ по моемъ къ Богу отшествіи и правити люди Божія; еже и бысть. И добрѣ

пасяше словесное стадо Христовыхъ овецъ, паче убо и паче протягъ усердіе къ подвигу, и множа умножи талантъ господина своего, и пребывая въ постѣ и молитвахъ, и слезахъ, и во всенощномъ стояніи молитву принося выну къ Богу. И пріять отъ Бога благодать разсужденія; разсужденіе бо, рекоша отцы, корень всѣмъ добродѣтелямъ. Къ сему же и врачевный хитрости преподобный Варсонофій искусенъ бѣ, и во имя Господне многія болящія тѣлеснѣ уврачева, еще живъ сый, мзды же не пріемля, якоже и прежніи святіи врачеве не пріемляху мзды, но туне врачеваху: кая бо потреба, рече, та стяжати, яже не можемъ съ собою взяти; больныхъ же паче врачеваше Духа Святаго благодатию душевныя страсти, врачъ бо бѣ искусенъ по Господни благодати обоимъ симъ врачеваніемъ; псалмы же Давыдовы непрестанна бѣ молитва къ Богу изъ устъ его; ручное же бѣ ему дѣлати клобуки гречестіи, еже ношаху святителіе; то бо дѣлалаше, и посылаіне братіи своей, и моляше ихъ молити о немъ Бога, то бо бѣ за руководѣліе нетлѣнная мзда ему.

## **Глава 16. О преставленіи преблаженнаго великаго архіереа Варсонофія, епископа Тферскаго, Казанскаго чудотворца.**

Егда же бѣ преподобный Варсонофій во глубочайшей старости, оставляетъ паству, и



преселяется паки въ созданный имъ монастырь, во обитель боголѣпнаго Спасова Преображенія, ея же самъ состави, въ ново просвѣщенной градъ Казань; и паки касается дѣлу своему, емуже бѣ обыкль, угождая Богу постомъ, и молитвою, и бдѣніемъ, и милостынею, и всенощнымъ стояніемъ, и труды ко трудомъ прилагая; и возлагаетъ на себе великій образъ. Скорбію же многою преподобный и болѣзнію дряхлствуя другимъ бываше, правила же своего не премѣняше никогдаже; къ церковною пѣнію старости ради и многихъ ради болѣзней не можаше уже ходити, но ученицы его къ церкви вожаху его на колесцахъ, дондеже изнеможе зѣло, и нача конечно болѣти; и познавъ отъ міра сего отшествіе свое къ Богу, и причастився божественныхъ и животворящихъ Христовыхъ Таинъ, отъиде ко Господу, егоже возлюби. Преставися же преподобный Варсонофій, епископъ Тѣферскій, въ лѣто 7084 [1576], априлія мѣсяца 11 дня, на память священномученика Антѣпы, епископа Пергама Асійскаго, и погребенъ бысть честно въ созданѣмъ отъ него монастырь, боголѣпнаго Спаса Господня Преображенія, архіепископомъ Тѣхономъ первымъ, по числу же пятымъ, близъ преподобнаго Гурія архіепископа. Тогоже лѣта, іуніа въ 14 день, архіепископъ Тѣхонъ ко

Господу отходить, и повелѣ положить себе въ монастырѣ святыя и живоначалныя Троицы, иже внутрь града Казани близъ двора архіепископя. И о семъ до здѣ.

**Глава 17. Мѣсяца октовріа въ 4 день сказаніе о обрѣтеніи мощей, иже во святыхъ отецъ нашихъ, Гуріа перваго архіепископа Казанскаго, и епископа Варсонофіа Тферскаго, Казанскихъ чудотворцовъ, въ лѣто 7104 [1595].**

Божіимъ изволеніемъ, повелѣваетъ благочестивый государь царь и великій князь Ѳеодоръ Іоанновичъ всея Россіи самодержецъ въ монастырѣ воздвигнути церковь каменну богольпнаго Спасова Преображенія. И егда начаша рвы копати, тогда гробницы каменные, иже бѣша надъ гробы святыхъ, преподобнаго Гуріа архіепископа Казанскаго, и Варсонофіа епископа Тферскаго, повелѣша сняти, зложена бо бѣ новая церковь болши первыя; и егда доидоша до цѣлбоносныхъ гробовъ преподобныхъ отецъ, октовріа въ 4 день, тогда повѣдаша мнѣ смиренному. Намъ же со всѣмъ освященнымъ соборомъ принесше Господу Богу безкровную жертву, и пѣвше панѣхиду, и шедше въ монастырѣ, приидохомъ на мѣсто, и поклонихомся нетлѣннымъ гробомъ преподобныхъ отецъ Гуріа и Варсонофіа. И

вскрывше гробъ Гуріа архієпископа, и видѣхомъ дивно, еюже не надѣяхомся, рака бо бѣ святаго полна благоуханна мвра, мощиже святаго Гуріа оки губа ношахуся, части же ни единой погруженѣ бывши: нетлѣніемъ бо одари Богъ честное и многотрудное его тѣло, яко и нынѣ зрится всѣми, токмо мало верхнія губы тлѣніе коснуся, протчія же уды его цѣлы быша; мнѣ же недостойному многогрѣшною моею рукою святаго тѣлеси коснувшуся: святое же тѣло его бѣ плавая; осязахомъ же и погребалныя ризы его, и бяху крѣпка зѣло; покусихомся же и мантии его, и прочей погребальной одежды его зѣло потягнути, и быша новыхъ крѣпчае; въ главахъ же у преподобнаго Гуріа лежаше клобукъ греческій вязенъ недовершенъ, о немже повѣдаютъ Варсонофіевы ученицы, яко той клобукъ дѣлаемъ бѣ преподобнымъ Варсонофіемъ преосвященному Гурію архієпископу, и егда Гурій архієпископъ преставися, тогда Варсонофій положи во гробъ Гурію въ возглавіе клобукъ той не довершенъ; намъ же соборнѣ смотрившимъ клобукъ той, и едину прядь изъ него взявше, и едва преторгнуша, всяко бо новаго крѣпчае бѣ; благоуханное же честное и святое мвро устроиша въ сосудъ новъ; православніи же христіане, монаси и мірстіи, и жены и

младенцы, мажущеся святымъ тѣмъ мѣромъ, исцѣленія неоскудна приємляху. Потомъ же открыхомъ раку преподобнаго Варсонофіа, и видѣхомъ многимъ нетлѣніемъ почтени отъ Бога мощи святаго Варсонофіа, къ ногамъ же преподобнаго тлѣніе коснуса, но обаче не токмо кости неразрушены, но и крѣпки бяху зѣло, и никакоже слабости въ составѣхъ имуще, якоже и Гурію святителю, своими бо руками съ Арсеніемъ архимандритомъ святыя ихъ и чудотворныя мощи преложихомъ отъ гробовъ въ ковчеги, и погребалныя ризы, такожде яко и Гурію, преподобному Варсонафію новыхъ крѣпчае. Мы же неизреченному человѣколюбію Божію дивящеся, со слезами и радостію пѣвше надгробная надъ преподобными отцы, и поставихомъ ихъ на верху земли, да вси приходяще видятъ, и дивящеся славятъ Бога, прославляющаго святыя своя, и цѣлуютъ съ вѣрою честныя и святыя ихъ мощи. Два же монаха Іона и Нектарій, иже къ Гурію архіепископу вѣру несумнѣнну держаста, и во единой гробницѣ положиаста съ нимъ, о нихже прежде речено бысть, тѣи такожде многимъ нетлѣніемъ почтени быша, и ризы ихъ не истлѣша; и надъ сими такожде надгробная пѣвше, земли предахомъ. Возвѣстихомъ же о семъ государю царю самодержцу великому

князю Θεодору Іоанновичу всея Россіи, и святѣйшему Іову патріарху Московскому и всея Россіи, писаніемъ со архимандритомъ Арсеніемъ тояжде святыя обители. Святый же царь, и святый патріархъ, и весь царскій свнклить, и множество благочестивыхъ воздаша о семъ славу Богу, яко невѣрныя люди въ вѣру привели, и устроили вѣровати, и поклонятися единому въ Троицѣ славивому Богу, и святымъ крещеніемъ просвѣтили, и яко неплодную землю, доброплодну сотворили, и въ Троицѣ славимый Богъ преподобныхъ сихъ святителей нетлѣнны показа. Благочестивый же самодержецъ, и святый патріархъ, повелѣша хранить честныя ихъ и многотрудныя и многоцѣлебныя мощи на верху земли; и у болшія церкви, со южныя страны олтаря, повелѣша церковь создати, и ту поставити мощи святыхъ отецъ нашихъ Гуріа и Варсонофіа, еже и бысть. Болшая же церковь благолѣпнаго Спасова Преображенія, милостію въ Троицѣ славимаго Бога, и молитвами Пресвятыя Владычицы нашея Богородицы и преподобныхъ отецъ нашихъ Гуріа и Варсонофіа молитвами, изрядна и прекрасна лѣпотою устроися о пяти главахъ, величествомъ же и красотою малымъ чимъ недостаточествуетъ церкви Пресвятыя Богородицы, честнаго и славнаго ея Одигитрія, иже въ дѣвичи



монастырь въ Новомъ, близъ царствующаго града Москвы. Егда же убо благоволеніемъ Божиимъ обрѣтошася мощи, иже во святыхъ отецъ нашихъ Гуріа, перваго архіепископа новопросвѣщеннаго града Казани, и Варсонофіа, епископа славнаго града Тфери, тогда начаша бывать многа и различна чудесная исцѣленія отъ святыхъ мощей ихъ съ вѣрою приходящимъ. И приставиша хранить четырехъ монаховъ благоговѣйныхъ и богобоязливыхъ, Псалтырь говорити надъ святыхъ мощами.

Конецъ житій святыхъ чудотворцовъ казанскихъ

### **Примѣчаніе:**

**[1]** Здѣсь въ рукописи пробѣлъ.

**Источникъ: Творенія святѣйшаго Ермогена, Патріарха Московскаго и всея Россіи,** съ приложеніемъ чина поставленія въ Патріарха. — *Издание Церковной Комиссіи по чествованію юбилейныхъ событій 1612, 1613 и 1812 годовъ.* — М.: Печатня А. И. Снегиревой, 1912. — С. 35-51.

